

Nihn Paul Kijilikoau oang Mwomwohdjohn Philippi Oarlap in Kijilikoau oauwe

Nihn Paul kijilikoau oang Mwomwohdjohn Philippi ne insingdi oang mwomwohdjohu ma Paul sapin kouda nehn wein Europe, nehn Macedonia, wei oau ma kijehn wein Rome. Paul insingehdi kijilikoau kije nehn ah minmine nehn kalpwuhj, anjoauwo ma ih lel apwal jang ipen epwi sohndoadohk in mwomwohdjo apel injinjuwedkihla padahk likamw pwi ma ne pel pwokda nehn mwomwohdjohn Philippi. Apwen nehn kijilikoau oauwe peren, koapwoarpwoar ioar janjal, pwa jang in en Paul ah pwojon Jesus Christ ma inenin loal.

Kahrpoa keiou in kijilikoau kije insingda, pwa Paul en kapingkalahngankihoang joauloang in Philippi jauwaj ma irai kadardohng ipoa nehn anjoauwo ma ih anahne jauwaj. Ih kangoangehki irai en anki lamlam sihkei pwa irai en anki koapwoarpwoar nehn anjoaun apwal kan. Ih kangoangehki irai en kin anki mour in aksiksik doahr Christ, a jaudi mour in roprop oang pein irai ke aklaplap. Ih pel kasmanki irai pwa arai mour en oauwoang Christ, ioar kijakij jang in kalahngan en Koahs ma irai ne oaloahdi ki arai pwojon, a jaudi pwa irai kin peikkoang kojonnend in mihn Jew kan. Ih

insingehdi doahroar peren apel moaloailoai ma Koahs kin kioang irai kan ma kin oauwoang Christ nehn arai mour.

Mour in kijilikoau oauwe ioar peren, koapwoarpwoar, minmin, kanangmah nehn pwojon apel mour in joauloang. Ih pel kajalehda en Paul ah limpoak koalik oang mwomwohdjohn Philippi.

Audoapoa in Oarlap

Sapin kijilikoau 1:1-11

Irair pwi ma pid mourin Paul 1:12-26

Mour ipen Christ 1:27—2:18

Koajoandi kan oang Timothy apel Epaphroditus 2:19-30

Koahkoahlik pwi pid imwinsihsi apel me keper pwi 3:1—4:9

Paul apel ah pirien kan nehn Philippi 4:10-20

Koarjoahklahn Rahnmwahu 4:21-23

¹ Jang Paul apel Timothy, lidu in Christ Jesus

Oang *nihn Koahs armaj kan ohroj nehn Philippi, ma kin oauwoang Christ Jesus, pwilikh-ihla koaun kan apel jounkaweid kan in mwomwohdjo.

² Kalahngan apel popohl jang Jamasai Koahs apel asai Koaun Jesus Christ oang kamwai.

En Paul Kapkapki irai kan ma pirin wadek nah kijilikoau kan

1:1 ACT 16:12 * 1:1 nihn Koahs armaj ke armaj joarwi

³ Ngoahi kin kapingkalahngankihoang oai Koahs ki kamwai ohroj anjoau ohroj ma ngoahi kin samanda kamwai.

⁴ Apel anjoau ohroj ma ngoahi kin kapkapki kamwai, ngoahi kapkap nehn oai peren,

⁵ pwa jangin joangoan jauwaj ma kamwai kin jeuweje ki ngoahi nehn doadoahk in Rongmwehuwo, jangin sapinno lel rehnnoauwe.

⁶ Doari, ngoahi koapwoarpwoarki pwa Koahs, ma sapkihda doadoahk mwehu oauwe nehn kamwai, pirin wa doadoahk oauwe oaroh lel in imwin nehn Rehn in Christ Jesus.

⁷ Kamwai kin mine nehn oai mohngiong anjoau ohroj! Doari, koanoahng ngoahi en anki poapoahm oauwe oang kamwai, pwa kamwai ohroj pel pwili pwaijanki anjoau mwehu oauwe ma Koahs ne kihdoahng ngoahi. Iroa riau, apkas nehn oai mine nehn kalpwuhj, apel mehj nehn oai jaljaldekjili pwa ngoahi en doaroa apel poadokdi soang Rongmwehuwo.

⁸ Koahs ioar noai jounkadehde pwa ngoahi lallal mehlel nehn oai sikoah uhwen loal in oai poapoahm oang kamwai, ohroj indoa jang mohngiong in pein Christ Jesus.

⁹ Ngoahi kin kapkap pwa amwai limpoak en koalkoalikla pwa kamwai en marainkihla me mehlel apel wia kadeik pwung,

¹⁰ pwa kamwai en kak pilda da ma keiou mwehu. Doari kamwai ken jaldek jang joangoan jamin apel japwung ohroj nehn Rehn in Christ.

¹¹ Apel amwai mour en audohdkihda joangoan kemwehu mehlel ohroj ma Jesus Christ kalahpwuk kak kihda oang in lingin apel kapingpen

Koahs.

En Mour ioar Christ

¹² Rioai kan, ngoahi nimen kamwai en kidal joang mwehu kan ma ne wiawihoang ngoahi inenin jeuweje mehlel pwoaida mwehu in Rongmwehu.

¹³ Doari, ioar mehpwai kahrehda ohroj joun-jilajil in soahnpaj oauwe apel ohroj ma mine wijahi kidal pwa ngoahi mine nehn kalpwuhj jangin oai wia jounpapah in Christ.

¹⁴ Apel oai mine nehn kalpwuhj ne kakoalik-ihla en enkennoar armaj ohroj arai koapwoarpwoarki Koainno, kahrehng irai koakoairda koahiokla anjoau ohroj irai en kapahrakki Mahjanno nehn joh majpwehk.

¹⁵ Mehlel pwa epwi kin padahkki Christ jang in arai pihrin apel nimen akmai. A epwi kin padahkki jang nehn ahr mohngiong mwehu.

¹⁶ Irai pwiai kin padahk jang arai limpoak, pwa irai kidal pwa Koahs ma kioang oai doadoahk in doaroa Rongmwehuwo.

¹⁷ Epwi johkin kalohki Christ in mehlel a pwa jangin inoang in roprop oang pein irai; irai lemleme pwa irai pirin kioang ngoahi joangoan kadiroapw kan nehn anjoaukije ma ngoahi mine nehn kalpwuhj.

¹⁸ Johpwa wiahda mehkij! Ngoahi perenki, pwa Christ en lohkjili in wioapoa ohroj ma kak, joah lipilpil ma jangin inoang pwung ke japwung. A ngoahi pirin pwen perenkihoar,

¹⁹ pwa ngoahi kidal pwa jangin amwai kapkap apel jauwaj ma indoahjang Ngenin Jesus Christ, ngoahi uhdahn pirin jaldekla.

²⁰ Oai inoang apel koapwoarpwoar pwa ngoahi anahne pwoaida nehn oai pwukoa; a nehn anjoau ohroj a in mehlel anjoaukije, ngoahi anahne audohdki kommwad pwa jangin oai mour unjek, ngoahi en wahdo wahu oang Christ, joah lipilpil ma ngoahi mour ke mehdi.

²¹ Pwa dahioau mour? Oang ngoahi, mour ioar Christ. Mehdi, mwuhr, pirin wahdo kamwahu.

²² A ma oai mohmohmour pirin kahrehioang ngoahi en wia doadoahk kajampwal dir jang, a doar ngoahi jehjoahla ia minno ngoahi en pilda.

²³ Ngoahi ne lohdi loap riau. Ngoahi inenin nimen injang nehn mour oauwe, minehla ipen Christ, ma ioar wia mehkij inenin mwehu;

²⁴ a ki kamwai, wia kahrpoa inenin kajampwal oau ngoahi en mohmohmour.

²⁵ Doari, ngoahi kamehlele me. Ioar ngoahi kidalki pwa ngoahi en pwen mohmohmour. Ngoahi pirin minminehr ipamwai ohroj pwa ngoahi en kakoalikhla amwai koakoairda apel peren nehn amwai pwojon.

²⁶ Doari, nehn oai pirin pwurwe ipamwai, kahrpoa koalik oau pirin mine ipamwai pwa kamwai en kak juweiki ngoahi nehn amwai mour in oauwoang Christ Jesus.

²⁷ Anjoaukije, da kajampwal ioar mwomwen amwai mour en doahroar da ma Rongmwehu in Christ kajik; pwa ma ngoahi kak alwe kapang kamwai ke joah, ngoahi nen rong pwa kamwai

kin uhda soangsoang oaukihpene kahrpoa oauwoar apel ankihpene inoang oauwoar, kamwai kin oaupene doaroa pwojon Rongmwewhuwo.

²⁸ Kamwai joah kin mijik amwai imwinsihsi kan. A kamwai kommwad anjoau ohroj. Doari, me en kajalehioang irai pwa irai pirin pehrdi, a kamwai pirin kalwehdi — pwa ioar Koahs ma kin kioang kamwai sihkei in kalwehdi.

²⁹ Pwa kamwai ne oaloahdi anjoau mwewhu in papah Christ, jaudihoar kamehlele Ih, a pel jangin loklokki Ih.

³⁰ Apkas kamwai kak pwili ngoahi nehn mahwin. Ioar joangoan mahwin oauwe ma kamwai kapang ngoahi wia mehj, apel doahr kamwai rong, mahwinwahr ngoahi mine loaloa.

2

En Christ Aksiksik apel Laplap

¹ Amwai mour ipen Christ kin kasihkeila kamwai apel Ah limpoak kin kainjenmwahuwi kamwai. Kamwai kin oauwoang Ngen Joarwi apel kamwai kin kadek apel limpoakpene nehn pwungamwaikan.

² Doari, ngoahi kangoangehki kamwai en kaperenihda ngoahi mehlel nehn amwai ankihpene joangoan lamlam oauwoar, oaukihpene limpoak oauwoar, apel wia oauwoar nehn ngen apel lamlam.

³ Kamwai johpwa wia mehkij jang in amwai inoang in roprop oang pein kamwai, ke juwei mwahl, a kamwai en aksiksikpene nehn

pwungamwaikan, anjoau ohroj wiahki armaj kan pwa irai mwehu jang kamwai.

⁴ Kamwai en pohneje inoang in armaj kan, jaudi amwai kan oar doari.

⁵ Doari, kamwai uhdahn pirin ankihla joangoan lamlammohr ma Christ Jesus anki:

⁶ Ih kin anki mourin Koahs anjoau ohroj, A Ih johkin aksihkeiki pein Ih en pahrekkoang Koahs.

⁷ Ih pein pilda pwa Ih en mweidla meohroj Ih anki apel wiahla lidu men.

Ih wiahla armaj apel pwokdohng kisai in mwomwen armaj.

⁸ Ih kin aksiksik apel mourki peik oaroh lel mehdi —

Ah mehdi pohn lohpuhwo.

⁹ Jangin kahrpoahioauwe, Koahs ken kajapwilda Christ oang nehn wija ma keiou illoa apel kioang ad oau ma koalik jang ad kan ohroj.

¹⁰ A doari, pwa en woaunki oadoan Jesus, meohroj mohmohmour nehnloanng, pohn jampah, apel pehn jampah pirin poadpwomwla,

¹¹ apel kalohki pwa Jesus Christ ioar Koaun, oang klori in Koahs Jahm.

Dakda doahroar Maram nehn Jampah

¹² Doari, oai pirien kan, kamwai kin peikkoang ngoahi anjoau ohroj ma ngoahi kin minmine ipamwai. A keiou mwehu ma kamwai peikkoang ngoahi anjoau oauwe pwa ngoahi dohjang kamwai. Kamwai engdehn doadoahk nehn

amwai mijik apel poadidi pwa koamoaurpen amwai mour en unjekla,

¹³ pwa anjoau ohroj, Koahs kin kamwoakidi-hda kamwai en inoangioang apel kak en peikkoang kupwuroa.

¹⁴ Kamwai wia joang ohroj nehn joh koaulim ke akmai,

¹⁵ pwa kamwai en kak pwung apel mwakelkel in doahr nihn Koahs jeri dei pwi ma kin koaukoaujoan nehn pwungen armaj nauna apel dipan kan. Kamwai anahne dakda nehn pwungarai doahroar uju kan ma kin dakdakar nehn-loanng

¹⁶ nehn amwai kioang irai Mahjan in mourro. Ma kamwai wia doahro apkas a pirin kahrehioang ngoahi en juweiki kamwai nehn Rehn in Christ-o, pwa en kajalehda oai nannansi apel doadoahk kan ohroj johpwa ohla mwahl.

¹⁷ Dapwa insa in oai mour pirin widekla doahroar meiroang oau pohn meiroanngo ma amwai pwojon kin meiroangkihoang Koahs. Ma ioar doahro, ngoahi inenin peren; kamwai ohroj pwili ngoahi peren.

¹⁸ In joangoan mwommwohr, kamwai pel anahne peren; ngoahi pwili kamwai ohroj peren.

Timothy apel Epaphroditus

¹⁹ Ma ioar me kupwuren Koaun Jesus, ngoahi koapwoarpwoarki pwa ngoahi pirin kak kadarwe Timothy ipamwai nehn anjoau koaroan, pwa ngoahi en kak sihkeikihda rongin kamwai.

²⁰ Ih kalahpwuk ma pwili ngoahi kaspoahki kamwai.

²¹ Irai kan ohroj kin injinohkihoar pein arai mwoakid kan, a jaudi doadoahk in Jesus Christ.

²² Doari, pein kamwai kidal ia kaspoan ah wihwia kan. Ih apel ngoahi kin doadoahkpene in oadoan Rongmwehu doahroar pahpa men apel nah jermwein.

²³ Doari, ngoahi kajik in kadarwe ih ipamwai anjoau pispis mwerin oai en kidalda da nen wiawihoang ngoahi.

²⁴ Apel ngoahi koapwoarpwoarki Koaunno ma pein ngoahi pel pirin kak lelwe ipamwai nehn anjoau koaroan.

²⁵ Ngoahi ne lemehda pwa koanoahng en koadoadoarwe ipamwai riasai Epaphroditus, ma ne pasoahng ngoahi nehn doadoahk apel pei apel wia sohn kalohk men nehn ah jeuweje ngoahi.

²⁶ Ih ne koskihda ah en kapang kamwai ohroj apel inenin injinjuwedkihla amwai ne rongda pwa ih johmwehu.

²⁷ In mehlel, Epaphroditus pwen johmwehu apel enkennoar mehdi. A Koahs ipwilkihda ih, ipwilkihda kama koaroj; Koahs ken iroahdihjang ngoahi kainjinjuwed koalik oau.

²⁸ Pwa ngoahi pel kajkajik ngoahi en kadarwe ipamwai; pwa kamwai en pel pwuroahng perenda in amwai kapang ih, apel pein oai injinjuwed ken johlahjang.

²⁹ Doari, kamwai peren kajamwo ih nehn ah wia joauloang in Koaunno men. Woaunki ohroj joangoan armaj doahroar ih,

³⁰ pwa ih mihndahkihla ah mour. Ih enken-noar mehkihdi oadoan doadoahk in Christ, pwa ih en kioang ngoahi joangoan jauwajjo ma pein kamwai johkin kak kihdoa.

3

Pwung Mehlel

¹ En kaimwjekla, rioai kan, kamwai perperenki amwai oauwoang Koaunno. Ngoahi johpwa kadroapwki oai en kapwkapwurihoang iroahk ma ngoahi ne insingehdi mwowoa, apel kamwai pirin injenmwahuki ma ngoahi wia me.

² Kamwai mwajahn irai kan ma kin wia joang nauna kan, irai doahk kan, irai ma ngihsehse in poaloahpijoang palwarro.

³ Jaudi irai, a ioar kisai ma ne oaloahdi jorkomjaij mehlello, pwa kisai kin joarwihoang Koahs jangin Nengin Koahs apel malauki asai mour in oauwoang Christ Jesus. Kisai johkin liki siahk in majlikin kan.

⁴ Ngoahi kak oar, ma doahr, likihla joang pwiai. Ma emen in kamwai leme pwa ih kak liki siahk in majlikin, ngoahi kapwa anki dirin kahrpoa ngoahi en wia joanngoauwo.

⁵ Ngoahi jorkomjaijla rehn waluh mwerin oai noaisikdi. Ngoahi pwildak in Israel men, kijehn kadaudok in Benjamin, ma insa mwakelkel in mihn Hebrew. Doahroar mwomwen kolkol en mihn Jew Kojonneddo, ngoahi Pharisee men,

⁶ apel uhwen oai poadidi, ngoahi kin koalkoa mwomwohdjo. Uhwen en armaj men kak mehlel

pwa jangin ah peikkoang ruwoj in Kojonneddo, ngoahi pwanah joh oai japwung.

⁷ A ohroj joang pwiok ma ngoahi kin kak wadek pwa kaspoa, apkas ngoahi ne wiahkihla pwa joh kaspoa pwa jangin oadoan Christ.

⁸ Jaudi mehpwiokoar; ngoahi johla kaspoahki joang ohroj pwa mine joang pwi ma inenin kaspoa jang, ioar loalkoang in Christ Jesus oai Koaun. Oang in oadoa, ngoahi ne kerpwihla joang ohroj; ngoahi wiahkihla meohroj kid, pwa ngoahi en kak johjohki Christ

⁹ apel oauwoang Ih in unjek. Ngoahi ne joh pein oai pwung mehlel, joanngo ma kin kolkoldi jangin peikkoang Kojonneddo. Apkas ngoahi anki pwung mehlello ma kin indoa jangin pwojon Christ, joangoan pwunngo ma indoa jang Koahs apel poahjoankihda pwojon.

¹⁰ Ioarroar ngoahi mwehuki, ngoahi en kidalla Christ apel poahm manman in Ah iejda, ngoahi en pwili Ih nehn koaloklok kan, apel doahroarla Ih nehn Ah mehdi,

¹¹ nehn oai koapwoarpwoarki ma pein ngoahi pirin pel iejda jang mehdi.

Nansihoang Lel in Imwin

¹² Ngoahi johkak pwa ngoahi ne pwoaida ke unjekla. Ngoahi kin enngengdehnnoang en oaloahdi kijakijjo, ma ioar Christ Jesus ne nainkihla ngoahi.

¹³ In mehlel, rioai kan, ngoahi johpwa leme pwa ngoahi ne oaloa kijakijjo. A ioarroar, mehkijjoar ngoahi wia ioar moalkoahla da ma

ne doarihla, apel wia uhwen oai kak pwa ngoahi en lel da ma mine mwohioa.

¹⁴ Doari, ngoahi kin kijou inenwehng imwin, pwa ngoahi en oaloe kijakijjo, ma ioar mourro nehnloange ma Koahs panginki kisai nehn Christ Jesus.

¹⁵ Kisai ohroj ma koahiok nehn lamlam joarwi koanoahng anki joangoan poapoahm oauwe. A ma epwi kamwai anki poapoahm sohrohr jang me, Koahs pirin kajalehioang kamwai.

¹⁶ Joah lipilpil mwomw dahioau, kisai engdehnwe mwowoa doahroar koajoandi kan ma kisai kin kapwaihahda leldo apkas.

¹⁷ Rioai kan, kamwai joah uhdi amwai kin japjang ngoahi. Soahk kanaihoahng irai kan ma kapwaihahda koajoandi kan ma kamai koajoanehng kamwai.

¹⁸ Pehn dir mwowoa ngoahi ne pwehng kamwai joanngoauwe, ngoahi pirin pel kajpahlihoang, pwilihoar pilen mijoaihoa, dir ma arai mour kahrehioang irai wiahla imwinsihsihn Christ Ah mehdi in lohpuhwo.

¹⁹ Irai pirin imwjekla nehn ehl pwa arai kohs ioar inoang en palwoaroarai kan. Irai kin juweiki joang kan ma irai koanoahng mehkki; irai kin lemleme mihn nehn jampah.

²⁰ A kisai wia sowoa mehlel in nehnloange; kisai kajik asai Jounkoamoaur, Koaun Jesus Christ, en indoahjang nehnloange.

²¹ Ih pirin ukudla palwoaroasai kan ma jasihkei apel kin mehdi; ih pirin wiahng irai en doahroarla pein palwoaroa ma lingin klori,

doadoahkki manmanno ma mweidoahng Ih en kihpene meohroj pehn Ah koajoandi.

4

Kaweid kan

¹ Rioai kan, ia uhwen oai kin kajampwalki kamwai, apel ia uhwen oai kin loaleidki kamwai! Kamwai kin kaperenihda ngoahi mehlel doari ngoahi kin juweiki kamwai mehlel. Rioai kan, ioar mwomwen amwai koanoahng uhda soangsoang nehn amwai mour oang Koaunno.

² Euodia apel Syntyche, menlau ngoahi poaki kamwa en jong en pwungpene doahroar riari oau ipen Koaunno.

³ Apel koawoa ioangoai poadidi en, ngoahi nimen koawoa en jeuweje li kai pwa ira ne wia doadoahk apwal pwili ngoahi kalohkihjili Rongmwehuwo, pasoahng Clement apel ohroj irai ioangoai sohn doadoahk kan ma oadoarai ne mine nehn nihn Koahs puk in mourro.

⁴ Kamwai en malmalau anjoau ohroj nehn amwai minmin oang Koaunno. Ngoahi pwuroahng pwa: malmalau!

⁵ Kamwai kadekkoang armaj ohroj. Koaunno pirin [ken] indoa anjoau koaroan.

⁶ Joah pwunodki mehkij, a nehn ohroj amwai kapkap kan poaki Koahs da ma kamwai anahne; poakpoaki Ih ki mohngiong in kaping anjoau ohroj.

⁷ En Koahs moaloailoi, ma inenin jikjang en armaj loalkoang, en kolkol amwai mohngiong

kan apel lamlam kan nehn amwai oauwoang Christ Jesus.

⁸ Rioai kan, en kaimwjek, kamwai audohki-hda amwai lamlam joang kan ma mwihu apel koanoahng oaloo kapingpoo: joang kan ma mehleh, laplap, pwung, mwakelkel, ling, apel wooun.

⁹ Kamwai doadoahkki dama kamwai padahki apel oaloo jang ipoi, jang in oai sikesik apel oai wihwia kan. Doari, Koahs ma kin kioang kisai popohl en pwilpwili kamwai.

Kaping ki Kijakijjo

¹⁰ Nehn oai mour in oauwoang Koaunno, wia me kamaloo oau ooang ngoahi, mwerin anjoau woaroi, kamwai en pwuroahng anki anjoau mwihu in kajalehng ngoahi pwa kamwai kajampwalki ngoahi. Ngoahi joah pwa kamwai ne uhdi kajampwalki ngoahi — a en kawoahwoa pwa pwen joh amwai anjoau mwihu in kajalehda.

¹¹ Ngoahi johpwa siksikoo me jangin oai poapoahm in kerpwihekla; a jangin oai ne kidalla isarki da ma ngoahi anki.

¹² Ngoahi kidal mwomwen mour nehn anjoaun anahn apel mour nehn anjoau ma kin koalikjang isar. Ngoahi ne woahwoahkihla iroa rir oauwe, pwa nehn wija ohroj, anjoau ohroj, ngoahi pwen injenmwahu, mihndahr ma ngoahi moad ke mwakohko, ke ngoahi anki koalikla ke siksikla.

¹³ Ngoahi anki sihkei in wia joang ohroj jang in manmanno ma Christ kin kihdoahng ngoahi.

¹⁴ Doari, inenin mwihu amwai jeuweje ngoahi nehn oai apwal kan.

¹⁵ Kamwai mihn Philippi kan woahwoahki pwa ngoahi injang Macedonia anjoau pispis mwerin kalohki Rongmwewhuwo sapda. Kamwai ioar mwomwohdjo wa ma kalahpwuk jeuweje ngoahi. Kamwaihoar kin jeuweje ngoahi nehn oai paimwewhu kan pel nehn oai paijuwed kan.

¹⁶ Dir jang pehn oau ngoahi kin anahne jauwaj nehn Thessalonica, kamwai kin kadardohng ngoahi jauwaj.

¹⁷ Jaudi pwa ioarroar ngoahi nimen oaloe kijakij; in mehlel, ngoahi nimen kapang pai en kapasas oang amwai pwaij kan.

¹⁸ Doari, ioar noai peipahn kadehde joang ohroj kamwai kihdoahng ngoahi; koalikjang da ma anahn! Ngoahi ne oaloe joang ohroj ngoahi anahne apkas nehn en Epaphroditus ne wahdohng ngoahi amwai kijakij kan ohroj. Kijakij pwiai doahroar meiroang karahdinnoau oang Koahs, meiroang oau ma Ih kin pwungki apel perenki.

¹⁹ Doari, jangin koalikin Ah koapwoahpwoa ipen Christ, oai Koahsso pirin kioang kamwai meohroj kamwai kin anahne.

²⁰ Klori oang Jamasai Koahs jang apkas apel allaluhla. Amen.

Koarjoahklahn Rahnmwahu

²¹ Rahnmwahu oang emen emen * nihn Koahs armaj kan ma pel wia kijehn Christ Jesus. Irai kan ma kamehlele mine ipoai pel kadar arai rahnmwahu.

4:15 2Cor 11:9 **4:16** ACT 17:1 **4:18** Exo 29:18 * **4:21** nihn Koahs armaj ke armaj joarwi

²² Ohroj †nihn Koahs armaj ma mine me kadarwe rahnmwahu, a in mehlel irai ma sohn soahnpaj in ‡nahmwareki laplappo.

²³ Mweidoahng kalahngan in Koaunno Jesus Christ en minmine ipamwai ohroj.

† **4:22** *nihn Koahs armaj* ke *armaj joarwi* ‡ **4:22** *nahmwareki laplappo* ke *Caesar*

Mokilese Bible
Matthew and Mark in the Mokilese language of
Micronesia

Copyright © 2019 Mokilese Bible Translation Committee

Language: Mwoakilloa (Mokilese)

This is a draft translation. Please check back often for updates at <https://eBible.org/mkj/>.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-06-13

PDF generated using Haiola and XeLaTeX on 14 Jun 2025 from source files dated 13 Jun 2025

4097fd30-31ee-5fdc-8d01-bc0facef348a